

PLEIV SUMVITG

Reglament da salarisaziun
dalla pleiv Sumvitg

I. Disposiziuns generalas

Art. 1 Intent

Il present reglament da salarisaziun normescha l'indemnisaziun d'ufficials, funcziunaris e commembers da cumissiuns dalla pleiv Sumvitg, nun che prescripziuns specialas ni contracts stipuleschan enzatgei auter.

Art. 2 Egalitad dallas schlatteinas

Las indicaziuns da personas, funcziuns officialas ed indicaziuns professionalas en quest reglament serefereschon sin omisduas schlatteinas.

Art. 3 Assicuranzas e cuosts socials

¹ Duront il temps da lavur per la pleiv ei il personal engaschau d'assicurar conform allas pretensiuns legalas.

² Da mintga indemnisaziun ad ina persona privata vegn sia cumpart allas assicuranzas dil provediment public (assicuranzas socialas per vegls, survivents ed invalids, prestaziuns supplementaras, disoccupai, indemnisaziun per perdita da gudogn, maternitad) sco era dil provediment professional (assicuranza da pensiun ed accident) deducida, aschilunsch sco ei dat in'obligaziun da pagar contribuziuns. La pleiv presta la cumpart sco patruna e renda quen allas cassas dallas assicuranzas socialas.

³ Subsidiaramein valan las prescripziuns dallas assicuranzas socialas.

⁴ Ils detagls vegnan reglai el contract d'engaschament.

⁵ Plinavon vegn serrau giu in'assicuranza da responsabladad per ils ufficials e funcziunaris sco era per il personal engaschau.

Art. 4 Indemnisaziun per sesidas e lavur extraordinaria

¹ Lavur extraordinaria ei lavur che vegn prestada sin incarica speciala.

² Il temps da lavur usitau cumpeglia il temps naven dallas 07.00 – 18.00 e quei naven dil gliendisdis tochen il venderdis.

³ Sedutas e lavur extraordinaria enteifer il temps da lavur usitau vegnan indemnisadas cun frs. 30 per ura, denton max. frs. 200 per di, inclusiv il temps per la medema lavur che sto aunc vegnir prestada quei medem di ordeifer il temps da lavur usitau.

⁴ Per sedutas ed uatgas ordeifer il temps da lavur usitau vegn indemnisau frs. 40.

⁵ Lavur extraordinaria ordeifer il temps da lavur vegn indemnizada cun frs. 20 per ura, denton max. frs. 100 per di.

Art. 5 Spesas

¹ Per viadis cun ils mieds publics vegnan ils cuosts effectivs da secunda classa indemnizai. Viadis fatgs cun auto privat vegnan indemnizai per km tenor la reglamentaziun cantunala vertenta.

² Per l'indemnisaziun da dunsena e loschament vala la reglamentaziun cantunala vertenta.

³ Telefons, portos, spesas da biro etc. vegnan indemnizai tenor cuosts effectivs.

II. Determinaziuns specialas

Art. 6 Indemnisaziun suprastonza

¹ Ils commembers dalla suprastonza da pleiv obtegnan las suandontas indemnisaziuns:

- a) il president frs. 3'000,
- b) igl actuar frs. 1'000,
- c) igl administratur frs. 3'000.

² Il plevon obtegn negina indemnisaziun supplementara sco commember dalla suprastonza. L'indemnisaziun per sia lavur ei cuntenida ella paga tenor contract da lavur.

³ Quellas indemnisaziuns pauschalas ad onn valan per tutta lavur che cumpeta ad els tenor constituziun ed uordens, inclusiv sesidas da suprastonza, ulteriuras sesidas ed uatgas enteifer il territori dalla pleiv. Per sesidas, uatgas ordeifer il territori dalla pleiv sco era per lavur extraordinaria obtegnan els ulteriuramein l'indemnisaziun tenor artechel 4.

⁴ L'indemnisaziun agl administratur cuntegn buca la lavur:

- a) en connex cun igl engaschament dil persunal (rendaquens da paga cun segiradas etc.),
- b) menar l'entira contabilitad dalla pleiv e dils fondos incl. exequir ils pagaments ord il menaschi dalla pleiv,
- c) preparaziun dil rendaquen,
- d) preparaziun dils preventivs.

⁵ Per quella lavur vegn el indemnizaus supplementarmein cun ina pauschala annuala da frs. 3'000.

Art. 7 Indemnisaziun cumissiun da gestiun ed ulteriurs funcziunaris

¹ Ils commembers dalla cumissiun da gestiun obtegnan mintgin ina indemnisaziun da frs. 100 per lur lavur.

² L'indemnisaziun per ulteriurs funcziunaris decida la suprastanza da pleiv.

III. Determinaziuns finalas

Art. 8 Rapports

¹ Per tutta lavur e per tuttas spesas ei da presentar periodicamein in rapport cun indicar cuortamein la lavur prestada.

² Il rapport vegn controlaus e visaus dil president dalla pleiv.

Art. 9 Cass dispiteivels

En cass dispiteivels decida la cumissiun da gestiun davart l'indemnisaziun.

Art. 10 Midadas

La cumissiun da gestiun ha d'examinar quest reglament silmeins mintga 3 onns e ha da far eventualas propostas per midadas alla radunonza da pleiv.

Art. 11 Vigur

¹ Quest reglament va en vigur cun igl 1. da schaner 2017.

² Cull'entrada en vigur da quest reglament ein tuttas disposiziuns che stattan en cuntradicziun cun quel abolidas.

Approbaus dalla radunonza constitutiva dils 22 da november 2016.

Per la pleiv transitoria Sumvitg

Il president

Igl actuar

Walter Deplazes

Armin Candinas